

Saturday, August 29, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

NATIONAL SPORTS DAY

Hnahtial DC Office leh Govt Higher Secondary School bultumin 'National Sports Day, 2026' chu vawiin khan District Volleyball Court-ah hman a ni a, he hun hi District Sports & Youth Officer leh Sub Deputy Commissioner (SDC) ni bawk, Pu Lawrence Lalhlanthara chuan a hmanpui. Zirlai mipa leh hmeichhia tan Table Tennis, Volleyball leh insuknawrah te inelna awmin hmeichhia tan bik hian inkawibah hmangin inelna a awm a ni.

National Sports Day hi India infiammi ropui, Major Dhyand Chand-a piancham puala hman niin kum tin August ni 29, 2012 atang khan hman thin a ni.



SUPPLY MINISTER - RETAILER

Food Civil Supplies & Consumer Affairs Minister Pu B. Lalchhanzova chuan retailer-te chu dinhmun zahawmah awm se, buhfai buk dik lo pe chhuaktu tia hriat ni lo se an duh thu a sawi a; retailer-te lawmman tihpun a nih dawn thu a sawi.

Akashvani News Aizawl zawhna chhangin Pu B Lalchhanzova chuan, buhfai buk dik turin sorkar chuan theihtawp a chhuah thu a sawi a; retailer-te hi hrem tumin an veh ngai lo a, an tihdik loh pawhin an tih dik loh dan a nasat leh nasat loh te, engtiang chiahin nge mipui an lungawi loh tihte chu DCSO leh an thawhpuiten District level-ah uluk takin an zirchiang thin tih a sawi.

((BYTE - Pu B. Lalchhanzova))

Retailer-te chu dinhmun zahawmah awm se, buhfai buk dik lo pe chhuaktu tia hriat ni lo se a duh thu sawiin Pu B Lalchhanzova chuan, social service tha tak petu tia hriat an nih theih nan theihtawp an chhuah tih a sawi a; tunah hian retailer lawmman chu Card var leh Card senah kg 1-ah cheng 1 leh duli a ni a, hei hi cheng 2-ah a chho dawn a, Card eng leh pawla kg 1-a cheng 2 leh pawisa 85 an hlawh thin chu Rs. 3 an hlawh tawh dawn, a ti bawk.



RESTRICTED TENDER - BLANKET APPROVAL

ZPM sorkar kal mekah Chief Minister Pu Lalduhoma chuan restricted tender hmanga hna thawh tur 117 atan blanket approval a pe tawh a; heng project 117 hi cheng vbc 957 point 17 man a ni.

Assembly Session neih zawh takah Chief Minister Pu Lalduhoma chuan MNF member Pu Robert Romawia Royte zawhna ziaka chhangin, sorkar kallai mek chhunga Chief Minister in Restricted Tender tura Blanket Approval a pek projects zat chu 117 a ni a, sum zat chu cheng vbc 957 point 17 a ni, a ti.

Chief Minister hian restricted tender hmanga hnathawh tur atan blanket approval hi vawi 2 a pe a; April ni 17, 2025 leh October ni 22, 2025 khan a pe chhuak a; SASCI hnuaia restricted tender hmanga hnathawh tur atan vek blanket approval hi pek chhuah a ni.



SMART METER

Mizorama chhungkaw 78,992 hnenah Electric Smart meter vuah a ni tawh a; Mizorama Smart Meter vuah hna hi M/s Satnam Global Infraprojects Ltd., Delhi ten an thawk mek.

Power & Electricity minister Pu F Rodinglana chuan Assembly Session neih zawh takah khan MNF member Pu Lalchhandama Ralte zawhna ziaka chhangin, Electric Smart Meter vuah hi tih ngei ngei ngai (mandatory) a nih thu a tarlang a; Smart meter vuah hi Mizoram puma district zawng zawngah kalpui a ni mek a, Consumer Meter 78,992, Distribution Transformer Meter 1,274 leh Feeber Meter 326 chu Smart Meter-a thlak an nih tawh thu a tarlang.

Mizorama Smart Meter vuah hna hi M/s Satnam Global Infraprojects Ltd., Delhi ten an thawk mek tih tarlangin Pu F Rodinglana chuan, Revamped Distribution Sector Scheme (RDSS) hnuaiah smart metering works atan cheng vbc 180, nuai 59 leh sing 2 leh, Information Technology/ Operational Technology (IT/OT) works atan cheng vbc 9 leh nuai 79 sanction hmuh a ni, a ti a; RDSS hnuaiah hian mi 177 traning pek an nih tawh thu a tarlang bawk.



BJP

Mizoram BJP president Dr K Beichhua chuan thuchhuah siamin, Chief Minister Pu Lalduhoma'n tunlai hian Mizoram history leh constitution kalhin thu a sawi fo tih a tarlang a; 6th Schedule Area inrelbawlna chungchanga tih àwm loh lutuka statement a siam chu pawl a tih thu a sawi.

Dr K Beichhua chuan, tunlai hian Chief Minister Pu Lalduhoma chuan Mizoram history leh constitution kalhin thusawi a nei ta zeuh zeuh tih a tarlang a, state khat CM meuhin ram history chungchang leh India dan ina Mizo hnam humhim nana provision a pekte thubelhchian dawl tâwklo hmanga statement a siam mai thin hi a zialo takzet a ni, a ti.

Mizoram chuan Chief Minister a nei nual tawh a, hetiang thil chungchangah hian ram Pa ber an nihna angin puitling takin dan leh social contract ina a phal piah lampangah an inrawlh ngailo tih tarlangin Dr K Beichhua chuan, CM kalta te an lo puitling in, an fakawm hle, a ti.

Dr K Beichhua chuan, Pu Lalduhoma hian Opposition Leader ni loin, state khat CM ani tawh tih inhre nawn se, Mizoram history leh inrelbawl dan chungchangah puitling lo tak taka thu a chhakchhuah hian nakinah Zofate tan pawl a thlen thei ani tih hi hre nawn turin kan chah duh a ni, a ti bawk.

